



佛說大乘無量壽莊嚴經

宋西天三藏朝散大夫試光祿卿明教大師法賢奉

詔譯



清刻龍藏佛說法變相圖

佛說大乘無量壽莊嚴經卷上中下 命十

宋西天三藏朝散大夫試光祿卿明教大師法賢奉 詔譯

如是我聞一時佛在王舍城鷲峯山中與大  
 苾芻衆三萬二千人俱皆得阿羅漢具大神  
 通其名曰尊者阿若憍陳如尊者馬勝尊者  
 麼瑟比拏尊者大名尊者跋多婆尊者稱天  
 尊者離垢尊者妙臂尊者布闍拏枳曩尊者  
 憍梵波提尊者優樓頻螺迦葉尊者那提迦  
 葉尊者舍利子尊者大目乾連尊者摩訶迦  
 旃延尊者摩訶俱絺羅尊者劫賓那尊者摩  
 訶剎那尊者彌多羅尼子尊者阿那律尊者  
 喜尊者緊鼻哩拏尊者須菩提尊者哩嚩帝  
 尊者佉禰囉嚩彌枳曩尊者摩賀囉倪尊者  
 波囉野尼枳曩尊者嚩拘隸曩尊者阿難陀  
 尊者羅睺羅尊者善來如是等三萬二千人

俱爾時尊者阿難即從座起偏袒右肩右膝著地合掌頂禮白佛言世尊如來應正等覺諸根清淨面色圓滿寶剎莊嚴如是功德得未曾有云何所行廣大妙行及過去未來諸佛所行願爲宣說佛告阿難善哉善哉汝爲利益一切衆生懷慈愍心能問如來微妙之義汝今諦聽善思念之如來應供正遍知今爲汝說佛告阿難如過去無量無邊不可思議阿僧祇劫爾時有佛世尊出現於世名曰然燈如來應正等覺彼然燈佛前復有世尊出現世間名鉢囉多波野輸如來又彼佛前有佛出世名發光如來又彼佛前有佛出世名贊那曩誡囉護如來又彼佛前有佛出世名須彌劫如來又彼佛前有佛出世名月面如來又彼佛前有佛出世名無垢面如來又

彼佛前有佛出世名無著如來又彼佛前有佛出世名龍主如來又彼佛前有佛出世名日面如來又彼佛前有佛出世名山響音王如來又彼佛前有佛出世名須彌峯如來又彼佛前有佛出世名金藏如來又彼佛前有佛出世名火光如來又彼佛前有佛出世名不動地如來又彼佛前有佛出世名瑠璃光如來又彼佛前有佛出世名月王如來又彼佛前有佛出世名日音如來又彼佛前有佛出世名散華莊嚴如來又彼佛前有佛出世名吉祥峯如來又彼佛前有佛出世名持海慧自在通王如來又彼佛前有佛出世名施光如來又彼佛前有佛出世名大香象光如來又彼佛前有佛出世名離一切垢如來又彼佛前有佛出世名勇猛峯如來又彼佛前

有佛出世名寶光如來又彼佛前有佛出世  
名持多德得通如來又彼佛前有佛出世名  
過日月光如來又彼佛前有佛出世名最上  
瑠璃光如來又彼佛前有佛出世名慧華開  
心行出生如來又彼佛前有佛出世名大華  
林通王如來又彼佛前有佛出世名一月光  
如來又彼佛前有佛出世名破無明黑暗如  
來又彼佛前有佛出世名真珠珊瑚蓋如來  
又彼佛前有佛出世名三乘法自在王如來  
又彼佛前有佛出世名師子海峯自在王如  
來又彼佛前有佛出世名梵音聲自在王如  
來又彼佛前有佛出世名世自在王如來應  
正等覺明行足善逝世間解無上士調御丈  
夫天人師佛世尊而於法中有一苾芻名曰  
作法信解第一明記第一修行第一精進第

一智慧第一大乘第一爾時苾芻離自本處  
來詣佛前頭面禮足於一面立即以伽他嘆  
佛面色端嚴復發廣大誓願頌曰

如來微妙色端嚴 一切世間無有等  
光明無量照十方 日月火珠皆曜曜  
願我得佛清淨聲 法音普及無邊界  
宣揚戒定精進門 通達甚深微妙法  
智慧廣大深如海 內心清淨絕塵勞  
超過無邊惡趣門 速到菩提究竟岸  
亦如過去無量佛 威光普照衆生界  
爲彼群生大導師 度脫老死令安隱  
常行布施及戒忍 精進定慧六波羅  
未度有情令得度 已度之者使成佛  
我以一切伸供養 百千俱胝那由他  
恒河沙數佛世尊 令我成就寂滅果

復有十方諸佛刹 恒放光明照一切  
殊勝莊嚴無等倫 願我成就利群品  
所有無邊世界中 輪迴諸趣衆生類  
速生我刹受快樂 不久俱成無上道  
願我精進恒決定 常運慈心拔有情

度盡阿鼻苦衆生 所發弘誓永不斷

爾時世尊告阿難言彼作法苾芻說是偈已  
白世自在王如來我今發阿耨多羅三藐三  
菩提心樂求無上正等正覺唯願世尊說諸  
佛刹功德莊嚴若我得聞恒自修持嚴土之  
行爾時世自在王如來告作法苾芻言汝自  
思惟修何方便而能成就佛刹莊嚴苾芻白  
言我智慧微淺不能了知嚴刹之行如來應  
正徧知願爲宣說諸佛刹土莊嚴之事時世  
自在王如來即爲宣說八十四百千俱胝那

由他佛刹功德莊嚴廣大圓滿之相經於一  
劫方可究竟爾時阿難聞是事已白佛言世  
尊彼世自在王佛壽量長短云何說土經於  
一劫佛告阿難彼佛壽命滿四十劫阿難彼  
作法苾芻聞佛所說八十四百千俱胝那由  
他佛刹功德莊嚴之事明了通達如一佛刹  
即時會中頭面禮足辭佛而退往一靜處獨  
坐思惟修習功德莊嚴佛刹發大誓願經於  
五劫爾時作法苾芻復詣世自在王如來所  
五體投地禮世尊足禮已合掌白佛言世尊  
如是八十四百千俱胝那由他佛刹功德莊  
嚴所行行願我今成就時世自在王如來告  
苾芻言善哉善哉汝之行願思惟究竟今正  
是時爲衆解說時諸菩薩聞是法已得大善  
利能於佛刹修習莊嚴爾時作法苾芻聞佛

命十

五

聖旨徧袒右肩右膝著地合掌向佛即爲宣  
說世尊我發誓言願如世尊證得阿耨多羅  
三藐三菩提所居佛刹具足無量不可思議  
功德莊嚴所有一切衆生及焰摩羅界三惡  
道中地獄餓鬼畜生皆生我刹受我法化不  
久悉成阿耨多羅三藐三菩提一切皆得身  
真金色世尊我得菩提成正覺已十方世界  
所有衆生今生我刹如諸佛土人天之衆遠  
離分別諸根寂靜悉皆令得阿耨多羅三藐  
三菩提世尊我得菩提成正覺已十方世界  
所有衆生今生我刹得大神通經一念中周  
徧巡歷百千俱胝那由他佛刹供養諸佛深  
植善本悉皆令得阿耨多羅三藐三菩提世  
尊我得菩提成正覺已所有衆生今生我刹  
一切皆得宿命智通能善觀察百千俱胝那

由他劫過去之事悉皆令得阿耨多羅三藐  
三菩提世尊我得菩提成正覺已所有衆生  
今生我刹一切皆得清淨天眼能見百千俱  
胝那由他世界麤細色相悉皆令得阿耨多  
羅三藐三菩提世尊我得菩提成正覺已所  
有衆生今生我刹一切皆得他心智通善能  
了知百千俱胝那由他衆心心所法悉皆令  
得阿耨多羅三藐三菩提世尊我得菩提成  
正覺已所有衆生今生我刹一切皆得住正  
信位離顛倒想堅固修習悉皆令得阿耨多  
羅三藐三菩提世尊我得菩提成正覺已所  
有衆生今生我刹所修正行善根無量徧圓  
寂界而無間斷悉皆令得阿耨多羅三藐三  
菩提世尊我得菩提成正覺已所有衆生今  
生我刹雖住聲聞緣覺之位往百千俱胝那

由他寶刹之內徧作佛事悉皆令得阿耨多羅三藐三菩提世尊我得菩提成正覺已所有衆生令生我刹一切皆得無邊光明而能照耀百千俱胝那由他諸佛刹土悉皆令得阿耨多羅三藐三菩提世尊我得菩提成正覺已所有衆生令生我刹命不中天壽百千俱胝那由他劫悉皆令得阿耨多羅三藐三菩提世尊我得菩提成正覺已所有衆生令生我刹無不善名聞無量無數諸佛刹土無名無號無相無形無所稱讚而無疑謗身心不動悉皆令得阿耨多羅三藐三菩提世尊我得菩提成正覺已所有衆生求生我刹念吾名號發志誠心堅固不退彼命終時我令無數苾芻現前圍繞來迎彼人經須臾間得生我刹悉皆令得阿耨多羅三藐三菩提世

尊我得菩提成正覺已所有十方無量無邊無數世界一切衆生聞吾名號發菩提心種諸善根隨意求生諸佛刹土無不得生悉皆令得阿耨多羅三藐三菩提世尊我得菩提成正覺已所有衆生令生我刹皆具三十二種大丈夫相命十一生令得阿耨多羅三藐三菩提世尊我得菩提成正覺已所有衆生令生我刹若有大願未欲成佛爲菩薩者我以威力令彼教化一切衆生皆發信心修菩提行普賢行寂滅行淨梵行最勝行及一切善行悉皆令得阿耨多羅三藐三菩提世尊我得菩提成正覺已所有衆生令生我刹於一切處承事供養無量百千俱胝那由他諸佛種諸善根隨意所求無不滿願悉皆令得阿耨多羅三藐三菩提世尊我得菩提成正覺已

我刹土中所有菩薩皆得成就一切智慧善  
談諸法祕要之義不久速成阿耨多羅三藐  
三菩提世尊我得菩提成正覺已我居寶刹  
所有菩薩發勇猛心運大神通往無量無邊  
無數世界諸佛刹中以真珠瓔珞寶蓋幢幡  
衣服卧具飲食湯藥香華妓樂供養承事迴  
求菩提速得成就阿耨多羅三藐三菩提世  
尊我得菩提成正覺已我居寶刹所有菩薩  
發大道心欲以真珠瓔珞寶蓋幢幡衣服卧  
具飲食湯藥香華妓樂承事供養他方世界  
無量無邊諸佛世尊而不能往我於爾時以  
宿願力令彼他方諸佛世尊各舒手臂至我  
刹中受是供養令彼速成阿耨多羅三藐三  
菩提世尊我得菩提成正覺已我居寶刹所  
有菩薩隨自意樂不離此界欲以真珠瓔珞

寶蓋幢幡衣服卧具飲食湯藥香華妓樂供  
養他方無量諸佛又復思惟如佛展臂至此  
受供劬勞諸佛令我無益作是念時我以神  
力令此供具自至他方諸佛面前一一供養  
爾時菩薩不久悉成阿耨多羅三藐三菩提  
世尊我得菩提成正覺已我居寶刹所有菩  
薩身長十六由旬得那羅延力身相端嚴光  
明照曜善根具足成就阿耨多羅三藐三菩  
提世尊我得菩提成正覺已我居寶刹所有  
菩薩爲諸衆生通達法藏安立無邊一切智  
慧斷盡諸結悉得證成阿耨多羅三藐三菩  
提世尊我得菩提成正覺已我居寶刹所有  
菩薩以百千俱胝那由他種種珍寶造作香  
爐下從地際上至空界常以無價栴檀之香  
普熏供養十方諸佛令得速成阿耨多羅三

藐三菩提世尊我得菩提成正覺已所居佛  
刹廣博嚴淨光瑩如鏡悉能照見無量無邊  
一切佛刹衆生覩者生布有心不久速成阿  
耨多羅三藐三菩提世尊我得菩提成正覺  
已我居寶刹所有菩薩晝夜六時恒受快樂  
過於諸天入平等總持門身光普照無邊世  
界不久得成阿耨多羅三藐三菩提世尊我  
得菩提成正覺已所有十方無量無邊無數  
世界一切女人若有厭離女身者聞我名號  
發清淨心歸依頂禮彼人命終即生我刹成  
男子身悉皆<sup>命十</sup>令得阿耨多羅三藐三菩提世  
尊我得菩提成正覺已所有十方無量無邊  
無數佛刹聲聞緣覺聞我名號修持淨戒堅  
固不退速坐道場成就阿耨多羅三藐三菩  
提世尊我得菩提成正覺已所有十方無量

無邊不可思議無等佛刹一切菩薩聞我名  
號五體投地禮拜歸命復得天上人間一切  
有情尊重恭敬親近侍奉增益功德成就阿  
耨多羅三藐三菩提世尊我得菩提成正覺  
已所有衆生發淨信心爲諸沙門婆羅門涂  
衣洗衣裁衣縫衣修作僧服或自手作或使  
人作作已迴向是人所感八十一生得最上  
衣隨身豐足於最後身來生我刹成就阿耨  
多羅三藐三菩提

佛說大乘無量壽莊嚴經卷上

佛說大乘無量壽莊嚴經卷中

宋西天三藏朝獻大夫試光祿卿明教大師法賢奉 詔譯

爾時作法苾芻白世尊言我得菩提成正覺已所有一切衆生聞我名號永離熱惱心得清涼行正信行得生我刹坐寶樹下證無生忍成就阿耨多羅三藐三菩提世尊我得菩提成正覺已所有十方一切佛刹諸菩薩衆聞我名號應時證得寂靜三摩地住是定已於一念中得見無量無邊不可思議諸佛世尊承事供養成就阿耨多羅三藐三菩提世尊我得菩提成正覺已所有十方一切佛刹聲聞菩薩聞我名號證無生忍成就一切平等善根住無功用離加行故不久令得阿耨多羅三藐三菩提世尊我得菩提成正覺已所有十方一切佛刹諸菩薩衆聞我名已生

命十

希有心是人即得普徧菩薩三摩地住此定已於一念中得至無量無數不可思議諸佛刹中恭敬尊重供養諸佛成就阿耨多羅三藐三菩提世尊我得菩提成正覺已於我刹中所有菩薩或樂說法或樂聽法或現神足或往他方隨意修習無不圓滿皆令證得阿耨多羅三藐三菩提世尊我得菩提成正覺已所有十方一切佛刹聞我名者應時即得初忍二忍乃至無生法忍成就阿耨多羅三藐三菩提爾時作法苾芻向彼佛前發如是願已承佛威神即說頌曰  
我今對佛前 而發誠實願 獲佛十力身 威德無等等 復爲大國王 富豪而自在 廣以諸財寶 普施於貧苦 令彼諸群生 長夜無憂惱 出生衆善根 成就菩提果

我若成正覺 立名無量壽 衆生聞此號  
 俱來我刹中 如佛金色身 妙相悉圓滿  
 亦以大悲心 利益諸群品 願我智慧光  
 廣照十方刹 除滅諸有情 貪瞋煩惱暗  
 地獄鬼畜生 悉捨三塗苦 亦生我刹中  
 修習清淨行 獲彼光明身 如佛普照曜  
 日月珠寶光 其明不可比 願我未來世  
 常作天人師 百億世界中 而作師子吼  
 如彼過去佛 所行慈愍行 廣無量無邊  
 俱胝諸有情 圓滿昔所願 一切皆成佛  
 發是大願時 三千大千界 震動徧十方  
 天人空界中 散雨一切華 梅檀及沉水  
 稱讚大苾芻 願力甚希有 決定當作佛  
 廣利衆生界  
 復次阿難時作法苾芻對世自在王如來及

天人魔梵沙門婆羅門阿脩羅等發是願已  
 住真實慧勇猛精進修習無量功德莊嚴佛  
 刹入三摩地歷大阿僧祇劫修菩薩行不生  
 慳貪心瞋恚心愚癡心亦無欲想瞋想癡想  
 色聲香味觸想心不迷亂口不瘖瘂身不懈  
 怠但樂憶念過去諸佛所修善根行寂靜行  
 遠離虛妄堅守律儀常以愛語饒益衆生於  
 佛法僧信重恭敬調順柔軟依具諦門植衆  
 德本了空無相無願無爲無生無滅善護口  
 業不譏他過善護身業不失律儀善護意業  
 清淨無染所有國城聚落男女眷屬金銀珍  
 寶乃至色聲香味觸等都無所著恒以布施  
 持戒忍辱精進禪定智慧六度之行利樂衆  
 生軌範具足善根圓滿所生之處有無量無  
 數百千俱胝那由他珍寶之藏從地湧出攝

受無量無數百千俱胝那由他衆生發阿耨  
多羅三藐三菩提心如是之行無量無邊說  
不能盡復次阿難作法苾芻行菩薩行時於  
諸佛所尊重恭敬承事供養未曾間斷爲四  
大天王恒詣佛所恭敬禮拜承事供養爲忉  
利天王恒詣佛所恭敬禮拜承事供養爲夜  
摩天王兜率天王化樂天王他化自在天王  
乃至大梵天王等恒詣佛所恭敬禮拜承事  
供養復次阿難處閻浮提爲轉輪王受灌頂  
位及大臣官族等恒詣佛所恭敬禮拜承事  
供養爲刹帝利婆羅門等恒詣佛所恭敬禮  
拜承事供養如是經無量無數百千萬億劫  
親近諸佛植衆德本所集阿耨多羅三藐三  
菩提復次阿難作法苾芻行菩薩行時口中  
常出栴檀之香身諸毛孔出優鉢羅華香其

香普熏無量無邊不可思議那由他百千由  
旬有情聞此香者皆發阿耨多羅三藐三菩  
提心復次阿難作法苾芻行菩薩行時色相  
端嚴三十二相八十種好悉皆具足復以一  
切珍寶莊嚴兩臂手中恒出一切衣服一切  
飲食一切幢幡一切傘蓋一切音樂乃至一  
切最上所須之物利樂一切衆生令發阿耨  
多羅三藐三菩提心爾時阿難聞佛所說彼  
作法苾芻菩薩之行白世尊言作法苾芻爲  
是過去佛耶未來佛耶現在佛耶世尊告言  
彼佛如來來無所來去無所去無生無滅非  
過現未來但以酬願度生現在西方去閻浮  
提百千俱胝那由他佛刹有世界名曰極樂  
佛名無量壽成佛已來於今十劫有無量無  
數菩薩摩訶薩及無量無數聲聞之衆恭敬

圍繞而爲說法彼佛光明照於東方恒河沙數百千俱胝那由他不可稱量佛刹如是南西北方四維上下亦復如是復次阿難彼佛無量壽若化圓光或一由旬二由旬三由旬或百由旬千由旬百千由旬或俱胝那由他百千由旬乃至徧滿無量無邊無數佛刹復次阿難今此光明名無量光無礙光常照光不空光利益光愛樂光安隱光解脫光無等光不思議光過日月光奪一切世間光無垢清淨光如是光明普照十方一切世界天龍藥叉乾闥婆阿脩羅迦樓羅緊那羅摩睺羅伽人非人等見此光明發菩提心獲利樂故佛告阿難我住一劫說此光明功德利益亦不能盡復次阿難無量壽如來有如是百千萬十萬百萬一俱胝百俱胝千俱胝緊迦羅

數頻婆囉數那由他數阿由他數毗婆訶數嚩婆那數穰伽數阿僧祇數十阿僧祇數百阿僧祇數千阿僧祇數百千阿僧祇數阿摩你野數不可思議數如是無量無數聲聞之衆譬喻算數數不能及阿難彼大目乾連神通第一三千大千世界所有一切童男童女於一晝夜悉知其數假使百千俱胝聲聞神通之力皆如大目乾連又一一聲聞壽百千俱胝那由他歲盡其壽命數彼聲聞百分之中不及一分復次阿難譬如大海深八萬四千由旬廣闊無邊假使有人出身一毛碎爲百俱胝細如微塵以一一塵投海出水水在塵上形量亦爾如是投盡毛塵於意云何毛塵水多海中水多阿難白佛言世尊毛塵出水未及半合海水無量佛言阿難彼目乾連

等聲聞之衆盡其形壽數知數者如毛塵之水數未盡者如海中水如是彼佛有如是無量不可算數聲聞弟子又彼佛國土大富無量唯受快樂無有衆苦無地獄餓鬼畜生焰摩羅界及八難之報唯有清淨菩薩摩訶薩及聲聞之衆復次阿難彼佛國土有種種寶柱皆以百千珍寶而用莊嚴所謂金柱銀柱瑠璃柱玻瓈柱真珠柱碑礫柱瑪瑙柱復有金銀二寶柱金銀瑠璃三寶柱金銀瑠璃玻瓈四寶柱金銀瑠璃玻瓈真珠五寶柱金銀瑠璃玻瓈真珠碑礫六寶柱金銀瑠璃玻瓈真珠碑礫瑪瑙七寶柱復次阿難彼佛國土復有種種寶樹根莖枝幹黃金所成華葉果實白銀化作亦有寶樹根莖枝幹白銀所成華葉果實瑠璃化作亦有寶樹根莖枝幹瑠

命十

十五

瑠所成華葉果實玻瓈化作亦有寶樹根莖枝葉玻瓈所成華葉果實真珠化作亦有寶樹根莖枝幹真珠所成華葉果實碑礫化作亦有寶樹根莖枝幹碑礫所成華葉果實瑪瑙化作亦有寶樹根莖枝幹瑪瑙所成華葉果實黃金化作亦有寶樹黃金爲根白銀爲身瑠璃爲枝玻瓈爲梢真珠爲葉碑礫爲華瑪瑙爲果亦有寶樹白銀爲根瑠璃爲身玻瓈爲枝真珠爲梢碑礫爲葉瑪瑙爲華黃金爲果亦有寶樹瑠璃爲根玻瓈爲身真珠爲枝碑礫爲梢瑪瑙爲葉黃金爲華白銀爲果亦有寶樹玻瓈爲根真珠爲身碑礫爲枝瑪瑙爲梢黃金爲葉白銀爲華瑠璃爲果亦有寶樹真珠爲根碑礫爲身瑪瑙爲枝黃金爲梢白銀爲葉瑠璃爲華玻瓈爲果亦有寶樹

碑礫爲根瑪瑙爲身黃金爲枝白銀爲梢瑠璃爲葉玻瓈爲華真珠爲果亦有寶樹瑪瑙爲根黃金爲身白銀爲枝瑠璃爲梢玻瓈爲葉真珠爲華碑礫爲果如是極樂世界七寶行樹復次阿難彼佛國土清淨嚴飾寬廣平正無有丘陵坑坎荆棘沙礫土石等山黑山雪山寶山金山須彌山鐵圍山大鐵圍山唯以黃金爲地爾時阿難聞是語已白世尊言四大王天忉利天依須彌山王住夜摩天等當依何住佛告阿難夜摩兜率乃至色無色界一切諸天皆依空界而住阿難白言空界無礙云何依住業因果報不可思議佛告阿難汝身果報亦不可思議衆生業報亦不可思議諸佛聖力不可思議彼佛國土雖無大海而有泉河處處交流其水或闊十由旬二

命十

十六

十由旬三十由旬乃至百千由旬深十二由旬其水清淨具八功德出微妙聲譬如百千萬種音樂之聲徧諸佛刹一切衆生聞者適悅得大快樂又水兩岸復有無數栴檀香樹吉祥果樹華卉恒芳光明照曜若彼衆生過此水時要至足者要至膝者乃至要至頂者或要冷者溫者急流者慢流者其水一一隨衆生意令受快樂又於水中出種種聲佛聲法聲僧聲止息聲無性聲波羅蜜聲力聲無畏聲通達聲無行聲無生聲無滅聲寂靜聲大慈聲大悲聲喜捨聲灌頂聲出如是種種微妙音聲衆生聞已發清淨心無諸分別正直平等成熟善根永不退於阿耨多羅三藐三菩提心又彼佛刹其中生者不聞地獄聲餓鬼聲畜生聲夜叉聲鬪諍聲惡口聲兩舌

聲殺生聲偷盜聲一切惡聲而彼衆生色相  
端嚴福德無量智慧明了神通自在宮殿樓  
閣園林池沼衣服卧具如他化自在天最上  
快樂之具一切豐足復次阿難彼土衆生思  
香華等欲供諸佛作是念時華香瓔珞塗香  
末香幢幡傘蓋及諸妓樂隨意即至滿佛刹  
中若思飲食湯藥衣服卧具頭冠耳環真珠  
羅網等隨念即至亦徧佛刹又復思念摩尼  
寶等莊嚴宮殿樓閣堂宇房閣或大或小或  
高或下如是念時隨意現前無不具足復次  
阿難譬如有人少有財寶對受灌頂位刹帝  
利王所有威勢悉皆不現又刹帝利對天帝  
釋前所有威勢悉皆不現又天帝釋對他化  
自在天所有威勢悉皆不現又他化自在天  
等及色無色界一切威勢對無量壽如來極

樂國土悉皆不現如是彼土功德莊嚴不可  
思議復次阿難彼佛國土每於食時香風自  
起吹動寶樹樹相振觸出微妙音演說苦空  
無常無我諸波羅蜜復吹樹華落於地上周  
徧佛刹高七人量平正莊嚴柔軟光潔行人  
往來足躡其地深四指量如迦隣那觸身安  
樂過食時後是諸寶華隱地不現經須臾間  
復有風生吹樹落華布地面上如前無異初  
夜後夜亦復如是復次阿難彼佛國土無其  
黑闇無其星曜無其日月無其晝夜無其取  
捨無其分別純一無雜唯受清淨最上快樂  
若有善男子善女人若已生若當生是人決  
定證於阿耨多羅三藐三菩提於意云何彼  
佛刹中無三種失一心無虛妄二位無退轉  
三善無唐捐復次阿難東方有恒河沙數世

界諸佛如來出廣長舌相放無量光說誠實  
言稱讚無量壽佛不可思議功德南方亦有  
恒河沙數世界諸佛如來出廣長舌相放無  
量光說誠實言稱讚無量壽佛不可思議功  
德西方亦有恒河沙數世界諸佛如來出廣  
長舌相放無量光說誠實言稱讚無量壽佛  
不可思議功德北方亦有恒河沙數世界諸  
佛如來出廣長舌相放無量光說誠實言稱  
讚無量壽佛不可思議功德如是四維上下  
恒河沙數世界諸佛如來出廣長舌相放無  
量光說誠實言稱讚無量壽佛不可思議功  
德阿難於意云何欲令衆生聞彼佛名發清  
淨心憶念受持歸依供養求生彼土是人命  
終皆得往生極樂世界不退轉於阿耨多羅  
三藐三菩提復次阿難若有善男子善女人

聞此經典受持讀誦書寫供養晝夜相續求  
生彼刹是人臨終無量壽如來與諸聖衆現  
在其前經須臾間即得往生極樂世界不退  
轉於阿耨多羅三藐三菩提復次阿難若有  
善男子善女人發菩提心已持諸禁戒堅守  
不犯饒益有情所作善根悉施與之令得安  
樂憶念西方無量壽如來及彼國土是人命  
終如佛色相種種莊嚴生寶刹中賢聖圍繞  
速得聞法永不退轉於阿耨多羅三藐三菩  
提復次阿難若有善男子善女人發十種心  
所謂一不偷盜命十二不殺生三不婬欲命九四不妄  
言五不綺語六不惡口七不兩舌八不貪九  
不瞋十不癡如是晝夜思惟極樂世界無量  
壽佛種種功德種種莊嚴志心歸依頂禮供  
養是人臨終不驚不怖心不顛倒即得往生

彼佛國土有無量無數諸佛世尊稱讚無量  
壽佛功德名號聞是法已永不退於阿耨多  
羅三藐三菩提

佛說大乘無量壽莊嚴經卷中

佛說大乘無量壽莊嚴經卷下

宋西天三藏明教大夫試光祿卿明教大師法賢奉詔譯

復次阿難東方恒河沙數佛刹一一刹中有  
無量無數菩薩摩訶薩及無量無數聲聞之  
衆以諸香華幢幡寶蓋持用供養極樂世界  
無量壽佛南方恒河沙數佛刹一一刹中亦  
有無量無數菩薩摩訶薩及無量無數聲聞  
之衆以諸香華幢幡寶蓋持用供養極樂世  
界無量壽佛西方恒河沙數世界一一佛刹  
亦有無量無數菩薩摩訶薩及無量無數聲  
聞之衆以諸香華幢幡寶蓋持用供養極樂  
世界無量壽佛北方恒河沙數佛刹一一佛  
刹亦有無量無數菩薩摩訶薩及無量無數  
聲聞之衆以諸香華幢幡寶蓋持用供養極  
樂世界無量壽佛四維上下亦復如是各禮

佛足稱讚佛土功德莊嚴爾時世尊即說頌  
曰

東方世界恒河沙 一一刹中無數量  
菩薩聲聞發勝心 各以香華寶蓋等  
持至莊嚴佛刹中 供養如來無量壽  
供已禮足而稱讚 最上希有大福田  
如是西南及北方 四維上下恒沙界  
聲聞菩薩數亦然 皆以香華伸供養  
禮足旋繞懷敬愛 復讚如來宿願深  
積聚功德普莊嚴 無量無邊極樂國  
諸佛國界雖嚴飾 難比如來寶刹中  
復以天華供養佛 華散虛空爲傘蓋  
縱廣量等百由旬 色相莊嚴無有比  
徧覆如來寶刹中 互相慶慰生歡喜  
曾於過去百千劫 積集無量衆善根

捨彼輪迴三有身 令至解脫清淨刹  
爾時彼佛無量壽 化導他方菩薩心  
密用神通化大光 其光從彼面門出  
三十六億那由他 普照俱胝千佛刹  
如是人天普照已 即入如來須髻中

時會一切諸衆生 敬歎佛光未曾有  
各各俱發菩提心 願出塵勞登彼岸

爾時世尊說此偈已會中有觀自在菩薩即  
從座起合掌向佛而作是言世尊以何因緣  
無量壽佛於其面門放無量光照諸佛刹唯

願世尊方便解說令諸衆生及他方菩薩聞

是語已生希有心於佛菩提志樂趣求入不  
退位爾時世尊告觀自在菩薩言汝今諦聽  
吾爲汝說彼佛如來於過去無量無邊阿僧  
祇劫前爲菩薩時發大誓言我於未來成正

覺時若有十方世界無量衆生聞我名號或  
頂禮憶念或稱讚歸依或香華供養等如是  
衆生速生我刹見此光明即得解脫若諸菩  
薩見此光明即得受記證不退位手持香華  
及諸供具往十方界無邊淨刹供養諸佛而  
作佛事增益功德經須臾間復還本土受諸  
快樂是故光明而入佛頂復次阿難無量壽  
佛應正等覺所有菩提之樹高一千六百由  
旬四布枝葉八百由旬根入土際五百由旬  
華果敷榮作無量百千珍寶之色於其樹上  
復以月光摩尼寶帝釋摩尼寶如意摩尼寶  
持海摩尼寶大綠寶莎悉帝迦寶愛寶瓔珞  
大綠寶瓔珞紅真珠瓔珞青真珠瓔珞及金  
銀寶網等種種莊嚴復次阿難每於辰時香  
風自起吹此寶樹樹相敦觸出微妙音其聲

普聞無量世界衆生聞者無其耳病乃至成就阿耨多羅三藐三菩提若有衆生見此樹者乃至成佛於其中間不生眼病若有衆生聞樹香者乃至成佛於其中間不生鼻病若有衆生食樹果者乃至成佛於其中間舌亦無病若有衆生樹光照者乃至成佛於其中間身亦無病若有衆生觀想樹者乃至成佛於其中間心得清淨遠離貪等煩惱之病佛告阿難如是佛刹華果樹木與諸衆生而作佛事皆是彼佛過去大願之所攝受復次阿難彼佛刹中所有現在及未來生一切菩薩摩訶薩一生令得阿耨多羅三藐三菩提若有菩薩以宿願故入生死界作師子吼利益有情我今隨意而作佛事復次阿難彼佛刹中一切菩薩及諸聲聞身相端嚴圓光熾盛

周遍照耀百千由旬有二菩薩身光遠照三千大千世界阿難自言此二菩薩有大身光其名云何佛告阿難二菩薩者一名觀自在二名大精進現居此界作大利樂命終之後當生彼國復次阿難彼佛刹中一切菩薩容貌柔和相好具足禪定智慧通達無礙神通威德無不圓滿深入法門得無生忍諸佛祕藏究竟明了調伏諸根身心柔軟安住寂靜大乘涅槃深入正慧無復餘習依佛所行七覺聖道修行五眼照真達俗辯才總持自在無礙善解世間無邊方便所言誠諦深入義味度諸有情演說正法三界平等離諸分別無相無爲無因無果無取無捨無縛無脫遠離顛倒堅固不動如須彌山智慧明了如日月朗廣大如海出功德寶熾盛如火燒煩惱

薪忍辱如地一切平等清淨如水洗諸塵垢  
如虛空無邊不障一切故如蓮華出水離一  
切染故如雷震響出法音故如雲發隄降法  
雨故如風動樹發菩提芽故如牛王聲異衆  
牛故如龍象威難可測故如良馬行乘無失  
故如師子坐離怖畏故如尼拘樹覆蔭大故  
如須彌山八風不動故如金剛杵破邪山故  
如梵王身生梵衆故如金翅鳥食毒龍故如  
空中禽無住處故如慈氏觀法界等故如是  
菩薩徧滿佛刹吹法螺豎法幢擊法鼓然法  
燈離過清淨無迷無失手中出生華鬘瓔珞  
塗香末香一切供具持往百千俱胝那由他  
佛刹供養諸佛復於手中別出寶華散虛空  
中化成寶蓋廣十由旬或二十由旬乃至百  
千由旬徧諸佛刹經須臾間還來本國無愛

無著無取無捨身心寂靜佛告阿難此諸菩  
薩我土五濁之所無有經百千俱胝劫說不  
能盡佛告阿難吾今此土所有菩薩摩訶薩  
已曾供養無量諸佛植衆德本命終之後皆  
得生於極樂世界阿難汝起合掌面西頂禮  
爾時阿難即從座起合掌面西頂禮之間忽  
然得見極樂世界無量壽佛容顏廣大色相  
端嚴如黃金山又聞十方世界諸佛如來稱  
揚讚歎無量壽佛種種功德阿難白言彼佛  
淨刹得未曾有我亦願樂生於彼土世尊告  
言其中生者菩薩摩訶薩已曾親近無量諸  
佛植衆德本汝欲生彼應當一心歸依瞻仰  
作是語時無量壽佛於手掌中放無量光照  
于東方百千俱胝那由他佛刹於此世界所  
有黑山雪山金山寶山目真隣陀山摩訶目

眞隣陀山須彌山鐵圍山大鐵圍山大海江河叢林樹木及天人宮殿一切境界無不照見譬如日出明照世間亦復如是爾時會中苾芻苾芻尼優婆塞優婆夷天龍藥叉乾闥婆阿脩羅迦樓羅緊那羅摩睺羅伽人非人等皆見極樂世界種種莊嚴及見無量壽如來聲聞菩薩圍繞恭敬譬如須彌山王出于大海爾時極樂世界過於西方百千俱胝那由他國以佛威力如對目前又見彼土清淨平正譬如海面無有丘陵山嶮草木雜穢唯是衆寶莊嚴聖賢共住復次阿難又彼無量壽佛與諸菩薩聲聞之衆亦皆得見我身及娑婆世界菩薩聲聞人天之衆爾時世尊告慈氏菩薩言汝見極樂世界功德莊嚴宮殿樓閣園林臺觀流泉浴池不慈氏汝見欲界

諸天上至色究竟天兩種種香華徧滿佛刹作莊嚴不汝見菩薩聲聞淨行之衆而作佛聲演說妙法一切佛刹皆得聞聲獲利樂不汝見百千俱胝衆生游處虛空宮殿隨身不慈氏菩薩白佛言世尊如佛所說一一皆見慈氏白言云何此界命十一類衆生二十五雖亦修善而不求生佛告慈氏此等衆生智慧微淺分別西方不及天界是以非樂不求生彼慈氏白言此等衆生虛妄分別不求佛刹何免輪迴佛言慈氏極樂國中有胎生不慈氏白言不也世尊其中生者譬如欲界諸天居五百由旬宮殿自在游戲何有胎生世尊此界衆生何因何緣而處胎生佛言慈氏此等衆生所種善根不能離相不求佛慧妄生分別深著世樂人間福報是故胎生若有衆生以無相

智慧植衆德本身心清淨遠離分別求生淨  
刹趣佛菩提是人命終刹那之間於佛淨土  
坐寶蓮華身相具足何有胎生慈氏汝見愚  
癡之人不種善根但以世智聰辯妄生分別  
增益邪心云何出離生死大難復有衆生雖  
種善根供養三寶作大福田取相分別情執  
深重求出輪迴終不能得佛告慈氏譬如受  
灌頂位刹帝利王置一大獄於其獄內安置  
殿堂樓閣鈎欄窓牖牀榻座具皆以珍寶嚴  
飾所須衣服飲食無不豐足爾時灌頂王驅  
逐太子禁閉獄中復與錢財珍寶羅紈匹帛  
恣意受用佛告慈氏於意云何彼太子得快  
樂不慈氏白言不也世尊彼中雖有堂殿樓  
閣飲食衣服錢帛金寶隨意受用身閉牢獄  
心不自在唯求出離佛告慈氏若灌頂王不

捨其過彼諸大臣長者居士等可令太子免  
禁獄不慈氏白言王既不捨云何得出佛言  
如是如是彼諸衆生雖復修福供養三寶虛  
妄分別求人天果得報之時所居器界宮殿  
樓閣衣服卧具飲食湯藥一切所須悉皆豐  
足而未能出<sup>命十</sup>三界獄中常處輪迴而不自在  
假使父母妻子男女眷屬欲相救免終不能  
出邪見業王未能捨離若諸衆生斷妄分別  
植諸善本無相無著當生佛刹永得解脫慈  
氏菩薩白佛言世尊今此娑婆世界及諸佛  
刹有幾多菩薩摩訶薩得生極樂世界見無  
量壽佛成就阿耨多羅三藐三菩提佛言慈  
氏我此娑婆世界有七十二俱胝那由他菩  
薩摩訶薩已曾供養無量壽佛植衆德本當  
生彼國親近供養無量壽佛成就阿耨多羅

三藐三菩提復次阿難難忍佛刹有十八俱  
胝那由他菩薩摩訶薩生彼國土寶藏佛刹  
有九十俱胝那由他菩薩摩訶薩生彼國土  
火光佛刹有二十二俱胝那由他菩薩摩訶  
薩生彼國土無量光佛刹有二十五俱胝那  
由他菩薩摩訶薩生彼國土世燈佛刹有六  
十俱胝那由他菩薩摩訶薩生彼國土龍樹  
佛刹有一千四百菩薩摩訶薩生彼國土無  
垢光佛刹有二十五俱胝那由他菩薩摩訶  
薩生彼國土師子佛刹有一千八百菩薩摩  
訶薩生彼國土吉祥峯佛刹有二千一百俱  
胝那由他菩薩摩訶薩生彼國土仁王佛刹  
有一千俱胝那由他菩薩摩訶薩生彼國土  
華幢佛刹有一俱胝菩薩摩訶薩生彼國土  
光明王佛刹有十二俱胝菩薩摩訶薩生彼

國土得無畏佛刹有六十九俱胝那由他菩  
薩摩訶薩生彼國土悉皆親近供養無量壽  
佛不久當成阿耨多羅三藐三菩提佛言慈  
氏如是功德莊嚴極樂國土滿彼筭數無量  
之劫說不能盡若有善男子善女人得聞無  
量壽佛名號發一念信心歸依瞻禮當知此  
人非是小乘於我法中得名第一弟子佛告  
慈氏若有苾芻苾芻尼優婆塞優婆夷天龍  
藥叉乾闥婆阿脩羅迦樓羅緊那羅摩睺羅  
伽人非人等於此經典書寫供養受持讀誦  
爲他演說乃至於一晝夜思惟彼刹及佛身  
功德此人命終速得生彼成就阿耨多羅三  
藐三菩提復次慈氏今此經典甚深微妙廣  
利衆生若有衆生於此正法受持讀誦書寫  
供養彼人臨終假使三千大千世界滿中大

火亦能超過生彼國土是人已曾值過去佛  
受菩提記一切如來同所稱讚無上菩提隨  
意成就佛言慈氏佛世難值正法難聞如來  
所行亦應隨行於此經典作大守護爲諸有  
情長夜利益莫令衆生墮在五趣莊嚴獄中  
令諸有情種修福善求生淨刹爾時世尊而  
說頌曰

若不往昔修福慧 於此正法不能聞  
已曾供養諸如來 是故汝等聞斯義  
聞已受持及書寫 讀誦讚演并供養  
如是一心求淨方 決定往生極樂國  
假使大火滿三千 及彼莊嚴諸牢獄  
如是諸難悉能超 皆是如來威德力  
彼佛利樂諸功德 唯佛與佛乃能知  
聲聞緣覺滿世間 盡其神力莫能測

假使長壽諸有情 命住無數俱胝劫  
稱讚如來功德身 盡其形壽讚無盡  
大聖法王所說法 利益一切諸群生  
若有受持恭敬者 佛說此人真善友  
爾時世尊說此法時有十二俱胝那由他人  
遠塵離垢得法眼淨八百四千萬遍意解心  
得解脫天人衆中有二十二俱胝那由他人  
證阿那含果復有二十五俱胝人得法忍不  
退復有四十俱胝百千那由他人發阿耨多  
羅三藐三菩提心種諸善根皆願往生極樂  
世界見無量壽佛復有十方佛刹若現在生  
及未來生見無量壽佛者各有八萬俱胝那  
由他人得然燈佛記名妙音如來當得阿耨  
多羅三藐三菩提彼諸有情皆是無量壽佛  
宿願因緣俱得往生極樂世界佛說是語時

命十

三九

三千大千世界六種震動雨諸香華積至于  
膝復有諸天於虛空中作妙音樂出隨喜聲  
乃至色界諸天悉皆得聞歎未曾有爾時尊  
者阿難及慈氏菩薩等并天龍八部一切大  
衆聞佛所說皆大歡喜信受奉行

佛說大乘無量壽莊嚴經卷下

音釋

剗子本切 暱踞力切 穰如陽切 振除庚切 敦  
宅耕切 純胡官切 素也 觸也 敦